

夜

航

船

夜航船卷之六

古劍陶菴老人紬

選舉部

制科

賓興 周禮地官大司徒以鄉三物教萬民而賓興之
一曰六德智仁聖義忠和二曰六行孝友睦婣任恤
三曰六藝禮樂射御書數

槐花黃 料舉年舉子至八月皆赴科場時人語曰槐
花黃舉子忙

棘圍 通典禮部闈試之日嚴設兵衛拚棘圍之以防
假濫五代和凝知貢舉時進日士喜為喧譁以動主

司放榜則圍之以棘閉省門絕人出入凝撤棘圍關
省門而士肅然無譁所取皆一時英彥稱為得人
鄉貢進士 唐選舉志唐制取士之科多因隋舊其大
畧有二由學校曰生徒由州縣曰鄉貢皆升於有司
而進退之有科目有秀才有明經有進士

觀光上國 易經觀卦六四爻觀國之光利用賓于王
象曰觀國之光尚賓也

試士沿革 漢文帝始取士以策武帝加問經疑左雄
加章奏武帝始取士以詞賦唐太宗加律判及射立
宗取士以詩賦德宗加論及詔誥宋仁宗始加試經
義時王安石始去聲律對偶哲宗始詔專習經義始

廢詩賦。唐太宗始制鄉試會試。宋始定秋鄉試。春禮部會試。唐玄宗始移貢舉禮部典試。唐初郎官試。宗真宗始詔禮部三年一貢試。唐中宗始設三場。漢文帝始親策士。唐武后策問貢士於洛城殿。始殿試。宋太祖始御殿覆試。先是武后覆試。崔沔後間行之。宋太宗始臨軒。宰臣讀卷。仁宗始殿試。貢士不黜落。宋孝宗始進士引射。有陞甲。唐武后始制武舉。宋始印給試題。唐高祖始貢院設兵衛。搜衣服稽察出入。棘圍。武后始彌封。始糊名。宋真宗始席舍。後唐始禁懷挾。唐玄宗始嚴鄉貫。禁舉人冒籍。

○蕭何試學童誦九千字以上為史。左雄奏年十五

經為童子科始制童科。漢文帝始納粟宋仁宗始置太學三舍。漢武帝始制補博士弟子稱秀才元魏始制生員唐高祖始制秀才州縣類考。後魏令公卿子弟入學唐睿宗令舉人下第聽入學。宋開寶六年因徐士廉訴知舉不公帝御講武殿覆試親試自此始及第人賜綠袍靴笏賜宴賜詩自興國二年呂蒙正榜始分甲次賜同進士出身自興國八年宋白王世則榜始唱名自雍熙二年梁灝榜始封印試卷自咸平三年始置謄錄彌封覆考編排皆自祥符八年始。唐制禮部試舉人夜以三鼓為限宋率由白晝不復繼燭。

關節 士子行賄請求試官曰關節明朝楊士奇主試
有柱聯曰場列東西兩道文光齊射斗簾分內外一
毫關節不通風

甲乙科 漢平帝時歲課甲科四十人為郎中乙科二
十人為太子舍人丙科四十人補文學掌故

通籍 舉子登科後禁門中皆有名籍可恣意出入也
正奏特奏 科甲為正奏恩貢為特奏

金榜題名 崔實暴卒復生見冥司列榜將相金榜其
次銀榜州縣小官並是鐵榜今人得第謂之金榜題
名

銀袍鵠立 隋唐間試舉人皆以白衣卿相稱之又曰

白袍子試日引於院中謂銀袍鵠立

鄉試

天府賢書 周禮地官卿大夫三年則大比德行道藝而興賢者能者鄉老及鄉大夫以禮禮賓厥明鄉老鄉大夫羣吏獻賢能之書于王王再拜受之登于天府

鹿鳴宴 詩鹿鳴篇燕羣臣嘉賓之詩也貢院內編定席舍試已長吏以鄉飲酒禮設賓主陳俎豆歌鹿鳴之詩

孝廉 漢制舉人皆名孝廉不由科目始也曹操亦舉孝廉

破天荒

荊州應試舉人多不成名為天荒解劉蛻以

荊州解及第時號為破天荒

鬱輪袍

王維善琵琶

岐王使為伶人引至公主第獨

奏新曲號鬱輪袍因獻懷中詩主驚曰皆我素所誦

習嘗謂是古人佳作乃子為之耶因命更衣引之客
座召試官至第遣宮婢傳教作解頭及第

會試

南宮 唐開元中謂尚書省為南省門下中書為北省
南宮禮部也舊以禮部郎中掌省中文翰謂之南宮
舍人後之赴春榜曰赴南宮

知貢舉 唐選舉志云玄宗開元二十四年考功員外
郎李昂舉與貢舉詆訶進士李權文章大為權所陵
詬帝以員外望輕遂移貢舉于禮部以侍郎主之永
為例禮部進士自此始

玉筍班 唐李宗敏知貢舉所取多知名士世謂之玉
筍班

朱衣點頭 歐陽修知貢舉考試閱卷常覺一朱衣人

在座後點頭然後文章入格始疑傳吏一及回視一無所見因語同列而三歎常有句云文章自古無憑據惟願朱衣暗點頭

文無定價 韓昌黎應試不遷怒不貳貳過題見黜于陸宣公翊歲公復主試仍命此題韓復書舊作不易一字不易公大加稱賞擢為第一

奏改試期 宋朝科試在八月中子由忽感寒疾自料不能及矣韓魏公知而奏曰今歲制科之士惟蘇軾蘇轍最有聲望聞其弟轍偶病如此人不得就試甚非眾望須展限以待之上許之直待子由病痊方引就試比常例遲至二十日自後科試並在九月相國

呂仲徽不知其故東坡乃為呂言之呂曰韓忠獻之賢如此哉

同試走避 二蘇初赴制科之名同就試者甚多相國韓公偶與客言曰二蘇在此而諸人亦敢與之較試何也于是不試而去者十八九

屈居第二 嘉祐二年歐陽修知貢舉梅堯臣得蘇軾刑賞論以示修修驚喜欲以冠多士疑門生曾鞏所作乃置第二

龍虎榜 唐貞觀八年陸贄主試歐陽詹舉進士與韓愈李絳崔羣王涯馮宿庾承宣聯第皆天下名士時稱龍虎榜

殿試

狀元 唐武后天授元年二月策問貢士於洛陽殿前
狀元之名蓋自此始

淡墨書名 唐人進士榜必以夜書書必以淡墨或曰
名第者陰註陽受以淡墨書若鬼神之跡也

臚傳 集英殿唱第日皇帝臨軒宰臣進三名卷子讀
于御案前用牙棍點讀宰臣拆視姓名則曰某人鴻
臚寺承之以傳于階下衛士六七人齊聲傳其名而
呼之謂之傳臚

糊名 唐初擇人以身言書判六品以下集試選人皆
糊名令學士考判

臨軒策士 宋熙寧三年呂公著知貢舉密奏曰天子
臨軒策士用詩賦非舉賢求治之意合廷試乞以詔
策咨訪治道自是上御集英殿親試乃用策問

天門放榜 范仲淹判陳州時郡守母病召道士伏壇
奏章終夜不動至五更謂守曰夫人壽有六年守問
奏章何久曰天門放明年春榜觀者駢道以故稽留
問狀元曰姓王二字名下一字塗墨旁註一字遠不
可辨明春狀元王拱壽御筆改為拱辰

湘靈鼓瑟 錢起宿驛舍外有人語曰曲終人不見江
上數峰青起識之及殿試湘靈鼓瑟詩遂賦曰善鼓
雲和瑟常聞帝子靈馮夷徒自舞楚客不堪聽雅調

悽金石清音發杳冥蒼梧來暮怨白芷動芳馨流水
傳湘曲悲風過洞庭末聯久不屬忽記此二語足之
試官曰神句也遂中首選

志不在溫飽 王曾初舉進士省試禮部廷對皆第一
人或曰狀元中三場一生吃着不盡曾曰某生平志
不在溫飽

瓊林宴 宋太平興國八年宋白等及第賜宴瓊林苑
後遂為定制又曰自呂蒙正始

泥金報喜 天寶遺事新及第以泥金帖子附家書報
捷謂之泥金報喜

雁塔題名 唐韋肇及第偶於慈恩寺雁塔上題名後

人效之遂為故事自神龍以來杏林宴後于雁塔題
名同年中推善書者記之他時有將相則易硃書

曲江宴 曲江在西安府唐朝秀士登科第者賜宴曲
江每年三月三日游人最盛

慈榜 世傳大羅天放榜於慈珠宮故稱慈榜

一榜京官 宋太祖幸西都張齊賢以布衣獻十策語
太宗曰我到西都得一張齊賢異時可作宰相太宗
即位放進士榜欲置齊賢高等而有司落名三甲榜
末上不悅及注官一榜盡除京官

奪錦標 唐盧肇黃頗皆宜與人同舉鄉試郡守獨厚
餞頗明年肇狀元及第歸郡守延肇觀競渡有詩向

道是龍君不信果然錦奪得錦標歸守大勳

釋褐 宋興國二年始賜呂蒙正等釋褐加袍帶後遂
為例

燒尾宴 唐士人得第必展歡宴謂之燒尾宴謂魚化
為龍必燒其尾

賜花 唐懿宗開新第宴于同江乃命折花于金盒令
中使馳之宴所宣口勅曰便令簪花飲宴無不為榮
紅綾餅餠 唐僖宗幸南內興慶寺泛舟方食餅餠進
士在曲江有聞喜宴上命御府依人數各賜紅綾餅
餠所司以金盒進上命中官馳以賜故徐演詩云莫
欺老缺殘牙齒曾吃紅綾餅餠來

柳汁染衣 李固行古柳下聞彈指聲曰吾柳神也用
柳汁染子衣矣得藍袍當以棗糕祀我未幾及第

英雄入殼 唐太宗正觀中私幸端門見進士綴行而
出喜曰天下英雄入吾殼中矣時人語曰太宗皇帝
真長策賺得英雄盡白頭

取青紫 漢夏侯勝曰士患不明經術耳經術一明取
青紫如俛拾地芥耳

席帽離身 宋初士子猶襲唐俗皆曳袍垂帶出則席
帽自隨李吳累舉不第鄉人曰李秀才不知恁時席
帽離身及第後及乃遺鄉人詩曰為報鄉閭親戚道
如今席帽已離身

一日看徧長安花 王維登第得意之甚有一日看徧

長安花之句

踏李三 王十朋正榜第一李三錫副榜第一時有獻

戲正榜尾者曰舉頭雖不見王十伸腳猶能踏李三
五色雲見 韓忠獻弱冠舉進士在第二方唱名太史

奏曰下五色雲見遂拜右司諫權知制誥

青錢學士 唐張鷟舉制科甲第員半千稱鷟文辭猶

青銅錢萬選萬中時號青錢學士

天子門生 王寄幼有聲場屋間為李文定客文定薨

于位章聖臨奠見屏間有詩云雁聲不到歌樓上秋
色偏欺客路中愛之名見占對稱旨特許赴殿試既

登科有謝詩云不拜春官為座主親逢天子作門生
讀卷賀得士 開慶間王應麟充讀卷官至第七卷頓
首曰是卷古誼若龜鑑忠肝如鍊石臣敢以得士賀
遂擢第一乃文天祥也

門生

春官桃李 唐劉禹錫寄王侍郎放榜詩禮園新榜動
長安九陌人人走馬看一日聲名遍天下滿園桃李
屬春官

謝衣鉢 據言狀元以下到主司宅綴行而立歛名紙
通呈與主司對拜執事云請狀元請名第第幾人謝
衣鉢衣鉢謂與主司名第同者或與主司先人名第
同者謂之謝衣鉢

傳衣鉢 范質舉進士主司和凝愛其才以第十三登
第謂質曰君文宜冠多士屈居第十三名者欲君傳
老夫衣鉢耳後和入相質亦拜相

沆濯一氣 杜審權知貢舉收盧處權有戲之者曰座
主審權門生處權祥符二年崔沆收崔濯說者謂座
主門生沆濯一氣

頭腦冬烘 鄭侍郎薰主試疑顏標為魯公之後擢為
狀元及謝主司知其非是乃悔悞取時人嘲之曰主
司頭腦太冬烘錯認顏標是魯公

好腳跡門生 唐逢吉知貢舉榜未發而拜相及第士
子皆就中書省見座主時人謂好腳跡門生

陸氏荒庄 唐崔羣知貢舉歸其妻勸令置田羣曰予
有美庄三十所妻曰君非陸贄門人乎君主文柄約
其子不令就試贄如以君為良田則陸氏一庄荒矣

門生門下見門生 唐裴皞官僕射宰相馬胤孫桑維翰皆其所取士胤孫知貢舉引新進詣皞皞作詩曰門下門下見門生世以為榮維翰嘗過皞皞不迎不送或問之曰我見桑公于中書底僚也桑公見我于私第門生也何送迎之有

天子門生 宋趙逵紹興中對策當旨擢為第一獨忤秦檜意外除帝問逵安在授校書郎單車赴闕關吏迎合檜收搜逵橐中僅書籍耳比檜卒遷起居郎帝曰卿知之乎始終皆朕自擢檜一語不及卿以此信卿不附權貴真天子門生也

下第

點額 三秦第記龍門跳過者魚化為龍跳不過者暴腮點額

康了 柳冕應舉多忌謂安樂為安康榜出令僕探名報曰秀才康了

曳白 天寶二年以御史中丞張倚之子爽為第一議者蜂起玄宗覆試爽終日不成一日字謂之曳白

孫山外 孫山應舉綴名榜末朋儕以書問山得失答曰解名盡處是孫山餘人更在孫山外

我輩顏厚 劉蕡對策極得罪宦官考官馮宿等見蕡策歎服而畏宦官不敢收取榜出物論驚然李邵曰

劉黃下第吾輩登科能無顏厚

紅勒帛 劉幾屢試第一驟為險恠之語歐公惡之場
卷有曰天地軋萬物茁聖人發歐公曰此必劉幾批
曰秀才辣試官刷一大珠筆橫抹之謂紅勒帛後數
年又為御試考官試堯舜性仁賦曰靜以延年獨高
五帝之壽動而有勇形為四凶之誅公大稱賞及唱
名第一乃劉幾名易劉燁公愕然久之

花樣不同 盧仝下第出都逆旅有人嘲之曰如今花
樣且自收拾回去

倒綳孩兒 苗振第四人及第召試館職晏相曰宜稍
溫習熟振曰豈有三十年老娘而倒綳孩兒者乎既

試果不中公曰苗君果倒紉孩兒矣

大器晚成 老子云大器晚成漢馬援失意其兄馬况
謂援曰汝大器晚成

眼迷日五色 唐李程試日五色題呈卷楊於陵楊稱
許當作狀元而榜發無名楊持卷示主司主司懊恨
因謀之於陵擢狀元。後李薦為東坡客坡知貢舉
薦下第東坡送之詩曰平生漫說古戰場過眼終迷
日五色

舉子過夏 遊齋間覽長安舉子六月後落第者不出
京謂之過夏多借靜坊廟院作文曰夏課

文星暗

唐大中間天官奏云文星暗科場當有事後

徑三科皆覆試復多落第考官皆罰俸

操眊矐 國史補進士籍而入選謂之春闕不捷而醉
飽謂之操眊矐匿名造謗曰無名子

傍門戶飛 唐元和中士人下第多為詩刺試官獨章
孝標作歸燕詩以上庾侍郎曰舊壘危巢泥已落今
年故向社前歸連雲大廈無棲處更傍誰家門戶飛

薦舉

徵辟 凡訪求遺佚有訪詔名之曰徵郡國舉擢曰辟
三代官由訪舉漢始詔刺史守相得專辟隋煬帝始
州縣僚屬選舉一由吏部唐玄宗始文武選分屬吏
兵兩部

勸駕 漢高帝詔曰賢士大夫有肯從我游者吾能尊
顯之其有稱明德者長吏必身勸為之駕

計偕 漢武帝元光五年詔徵吏民有明當世之務習
先聖之術者縣次續食令與計偕

鶚薦 後漢穉衡始冠孔融愛其才與為友上表薦之
曰鷲鳥累百不如一鷲使衡立朝必有可觀

先容 鄒陽傳蟠木根祗輪困離竒為萬乘器者以左
右為之先容也

公門桃李 唐狄仁傑薦張柬之為宰相又薦夏官侍郎姚崇監察御史桓彥範太平州刺史史敬暉數人皆為名臣或謂仁傑曰天下桃李盡屬公門仁傑曰薦賢為國非為私也

藥籠中物 元行冲謂狄仁傑曰下之事上譬之富家積貯以自資也脯脂膜膜以供滋膳參朮芝苓以防疾病門下充為味者多矣願以小人充備一藥石仁傑嘆曰君正吾藥籠中物不可一日無也

道側竒寶 韓愈薦樊宗師于袁滋相公書曰誠不忍

奇寶橫棄道側

向陽花木 范文正公知杭州蘇鱗為屬縣巡檢簡城中官弁往往皆獲薦獨鱗在外邑未見收錄因公事入府獻詩曰近水樓臺先得月向陽花木早為春文正見而薦之

夾袋 呂蒙正夾袋中有擢摺子每四方人謁見必問有何人才客去即識之朝廷求賢取諸夾袋以應明珠暗投 鄒陽傳明月之珠夜光之璧以投于道莫不按劍相顧盼無因而至前也

相見之晚 主父偃上書閣下朝奏暮召時徐樂嚴安上書言世務上召三人曰公等安在何相見之晚也

齒牙餘論 南史謝朓好獎子人才會稽孔閻有才華
未貴時孔珪嘗令草讓表以示朓朓嗟吟良久手自
折簡薦之謂珪曰士子聲名未立應共獎成無惜齒
牙餘論

鉛刀一割 晉以譙王永為湘州刺史行至武昌敷與
之宴謂永曰足下雅素佳士恐非將相才也永曰公
未見知耳鉛刀豈無一割之用

四輩督趨 唐馬周傳中郎將常何言臣客馬周忠孝
人也帝即召之未至又遣四輩督趨之

舉賢良 漢武帝建元初始詔天下舉賢良方正直言
敢諫之士又用董仲舒議令郡縣歲舉孝廉各一人

限以四科一曰德行高潔志節清白二曰學通行修
經中博士三曰明習法令足以決疑按章覆問文中
御史四曰剛毅多畧遭事不惑明足決斷材任三輔
縣令四科取士終漢世不變

舉茂才 後漢安帝元嘉初尚書令左雄上言郡國強
仕自今孝廉年不滿四十不得察舉皆請詣公府諸
生試經學文吏課牋奏若有茂才異行自可不拘年
齒帝從之

濫爵

麟麒麟植 唐楊炯每呼朝士為麒麟植或問之炯曰
今之扮麒麟者必修飾其形覆之驢上象貌宛然及
去其皮還是驢耳無德而朱紫何以異是

白版侯 唐武后時封侯者衆鑄印不給遂有以白版
封侯者

斜封官 唐太平公主與安樂等七公主皆開府而主
府官屬皆濫悉出屠販納貲求官降墨勅斜封授之
故號斜封官

銅臭 漢靈帝鬻官爵崔烈進錢五百萬為司徒常問
其子鈞曰吾居三公外議若何鈞曰大人少有英稱

歷位卿守論者但嫌其銅臭耳

斗酒博梁州 漢孟沔以一斗葡萄酒遺張讓得梁州
刺史東坡詩云伯一斗酒博梁州

爛羊頭關內侯 更始劉聖公納趙萌女為后委政于
萌日夜飲宴後庭羣小膳夫濫受美爵長安人語曰
竈下養中郎將爛羊胃騎都尉爛羊頭關內侯

貂不足狗尾續 晉趙王倫篡位同謀者越階次奴隸
廝役亦加爵位每會貂蟬盈座時人語曰貂不足狗
尾續

彌天太保 更始時官爵太濫有彌天太保徧地司空
之稱

擢推盃脫 武后時濫用人時人為之語曰擢推侍御
史盃脫校書郎四齒耙為擢推言用官之濫如用耙
齒推聚之多盃小盃也盃脫之形模言個個相似也

官制

三公三孤 三公太師太傅太保三孤少師少傅少保
師天子所師傅傅相天子保保獲護天子

六卿 吏部曰太宰冢宰戶部曰大司徒禮部曰大宗
伯工部曰大司空兵部曰大司馬刑部曰大司寇
六官 吏部曰天官戶部曰地官禮部曰春官兵部曰
夏官刑部曰秋官工部曰冬官

以龍紀官 伏羲以龍紀官春官曰蒼龍夏官曰赤龍
秋官曰白龍冬官曰黑龍中官曰黃龍

以火紀官 神農以火紀官春官為大火夏官為鶉火
秋官為西火冬官為北火中官為中火

以雲紀官 黃帝始以雲紀官春官曰青雲夏官曰緡雲秋官曰白雲冬官曰黑雲中官曰黃雲

以鳥紀官 黃帝後以鳥紀官祝鳩氏為司農睢鳩氏為司馬司鳩氏為司空爽鳩氏為司寇鵲鳩氏為司事

以民事紀官 顓頊氏以民事紀官以少昊之子重為木正曰勾芒該為金正曰蓐收修熙相代為水正曰玄冥炎帝之子為土正曰勾龍顓頊之子為火正曰祝融勾龍能平水土後世祀以配社

太尉僕射 太尉秦官也等于三公掌兵左右僕射亦秦官也等于六卿

九錫 一大輅玄牡二駟馬袞冕之服赤舄副之三軒
縣之樂六佾之舞四朱戶以上居五納陛以登六虎
賁之士三百人七斧鉞各一八彤丹弓一彤矢百旅
弓十旅矢千九拒鬯一卣珪瓚副之

勒名鐘鼎 周禮司勳職鑄鼎銘勳言有功勳者鑄器
以銘之也

紀錄旂常 周禮王命君牙曰惟乃祖乃父服勞王家
厥有成績紀于太常太常者王之旌旂也有功者書
焉以表顯也

礪山帶河 漢高帝定天下剖符封功臣劍白馬而
盟之封爵之誓曰使河如帶泰山如礪國以永存爰

及苗裔

丹書鐵券 漢高與功臣剖符作誓丹書鐵券金匱石室藏之宗廟

尚寶 天子玉璽龍章玉后玉璽鳳章親正王金寶龜鈕勳爵金印麟鈕總兵銀印虎鈕布政銀印府州縣銅印御史鈇印

六部稱號 禮部曰祠部儀部膳部戶部曰民部版部金部倉部兵部曰駕部刑部曰比部工部曰水部虞部此稱自唐朝始

都御史 左都御史以其為御史之率故曰御史大夫巡撫都御史以其為憲臺之長故曰御史中丞

大九卿 六部尚書都察院通政大理寺卿謂之大九

卿

小九卿

太常太僕光祿鴻臚上林苑等卿翰林院國

子監祭酒順天府尹謂之小九卿

執金吾

漢武帝改秦中尉更名曰執金吾蓋吾者禦

也執金刀以禦非常者也又曰金吾鳥名取以辟除

惡鳥

率更令

師古曰掌知漏刻故曰率更令率音律

三獨坐

光武詔御史中丞與司隸校尉尚書令會同

並專席而坐京師號曰三獨坐

三老五更

後漢永平二年三雍成拜桓榮為五更晉

某年天子幸太學命王祥為三老三老五更總是一
人與尚書四岳一例

四姓小侯 漢外戚樊鄒陰馬四姓非列侯故曰小侯

宰相 參政 下丞相一等

歷代置相 顓頊置樂正黃帝七輔湯六傅伏羲置二
相秦獻公置左右二卿稱丞相莊襄王改相國唐莊
宗置丞相兼樞密唐中宗始置大學士五代置文明
殿大學士始為宰相兼職宋真宗置資政殿學士班
翰林上漢武帝置秘書令置太史令漢桓帝置秘書
監唐太宗始置宰相監修國史唐德宗始宰相政事
詔送秉筆

通明相 漢翟方進為丞相智能有餘兼通文法吏事
以儒術緣飾法律人號通明相

救時宰相 唐姚崇拜相問齊澣曰子為相何如管晏

澣曰管晏之法雖不能施于後世尤可以終其身公所為法隨復更之祇可為救時宰相

知大體 漢丙吉不問橫道死人而問牛喘吏謂失問吉曰宰相不親細事民鬪傷命則有司存方今春月牛喘恐陰陽失調宰相職司變理陰陽是以問之人稱其知大體

伴食相 唐盧懷慎為相自以才能不及姚崇政事皆推委不與人譏其為伴食宰相

紗籠中人 唐卜者胡蘆生卜筮甚驗李藩常問之生曰公乃紗籠中人藩不解所以後有異僧言凡宰相冥司必潛以紗籠護之恐為異物所擾藩默喜卜者

言果拜相

琉璃瓶覆名 五代唐廢帝擇相問左右皆言盧文紀
姚顛有聲望帝因悉書清望官名納琉璃瓶中夜焚
香祝天以筋挾之得盧文紀欣然相之

金甌覆名 唐玄宗卜相皆書其名內之金甌名曰甌
卜一日書崔琳等名問太子曰此宰相名若謂誰太
子曰非崔琳盧從願乎上曰然

枚卜 古天子卜相必書清望官名納金甌或琉璃瓶
中焚香祝天以筋挾之得其名即拜相故曰枚卜又
曰甌卜

魚頭參政 宋魯宗道為參政時樞密使曹利用恃權

驕驕橫公屢折之帝前時貴戚用事者莫不憚之稱
為魚頭叅政

骰子選 宋丁謂作叅政或率楊公文賀之謂曰骰子
選耳何足道哉

尚書 部曹 卿寺

古納言 唐玄宗用牛仙客為尚書張九齡諫曰尚書古之納言多用舊相居之仙客本河湟一使典耳按升清流齒班常伯此官邪也

天之北斗 李固疏陛下有尚書猶天之有北斗北斗為天之喉舌尚書為陛下之喉舌

六卿 隋文帝始定天下六部本漢光武分置署六曹吏曹職起伏義漢光武為選部魏始名吏部始居諸曹戶右戶部曹職起黃帝吳始為戶部唐武后始以戶部居禮部右禮曹職起顛頊之秩宗隋始為禮部兵刑曹職起黃帝隋始為兵部刑部工曹職起少昊

晉起部隋始為工部宋神宗復唐故事以吏部戶禮
兵刑工為次序

尚書 秦遣吏至殿中文書始號尚書後漢始專席魏
三品陳加至一品

侍郎 隋煬帝置六曹侍郎副尚書名始秦

郎中 漢置尚書郎分掌尚書事名始秦

員外 隋文帝命尚書六曹增置員外郎名始漢

主事 隋煬帝主置主事副員外郎名始漢武帝

司務 宋置六部司務

九卿 夏后氏始置九卿漢設九卿不以官名但稱九

寺梁武帝始加卿字後魏始置少卿以卿為正卿

大理寺 黃帝立士師有虞為士師夏始稱大理秦置大理正今卿置廷尉正今寺正魏置少卿晉武帝置丞隋煬帝置評事

太常寺 本周官春官之職秦稱奉常漢改太常名始有虞後漢置卿秦置丞魏文帝置博士漢武帝置郎置司樂置協律隋置郊社置署今天地壇祠祭署唐置簿

太僕寺苑馬寺職始周官梁置簿漢置監

光祿寺 本秦置郎中令掌宮掖漢為光祿勳梁始改光祿卿北齊兼膳羞隋始專掌唐始署珍羞官因隋隋始署大官名因秦始署良醞即漢湯官掌醞本周

官酒正醕人置

鴻臚寺 漢武帝置大鴻臚梁武帝除大字本秦典客
周大行人

國子監 周以師氏保氏教養國子始名國子晉武帝
始立國子學隋煬帝始改國子監漢始定祭酒銜名
本周隋煬帝置司業並周職漢武帝置博士名始秦
晉武帝置教隋煬帝置丞北齊高洋置簿宋神宗置
錄

宮詹 學士 翰苑

東宮官 秦始皇置詹事漢因掌太子家唐玄宗置少詹事並輔導東宮。周公置左右庶子唐高宗置左右諭德贊善隋文帝置內允即中允北齊置門下典書二坊。秦始皇署洗馬先導太子晉始為詹事屬官掌圖籍。漢蘭臺置校書北齊置正字

翰林 伏羲始立史官唐玄宗置修撰編修簡討宋文帝置學士後魏置太子侍講唐玄宗置侍講學士侍讀學士侍講侍讀侍詔漢武帝置博士宋置孔目

玉堂 宋蘇易簡充承旨多振舉翰林故事太宗為飛白書院額曰玉堂及以詩賜之太宗曰此永為翰林

中一美事易簡曰自有翰林未有如今日之榮也

木天 類苑秘書閣下穹隆高敞謂之木天

鰲禁 宋公白賈公黃中皆先達鉅儒同在鰲禁

內相 唐陸贄博學弘詞入翰林德宗重其才呼先生而不名雖外有宰相主大議贄常居中參議號曰內相

摛文堂 宋真宗政和五年御書摛文堂榜賜學士院
五鳳齊飛 宋太宗時賈黃中宋白李至呂蒙正蘇易簡同時拜翰林學士扈蒙云五鳳齊飛入翰林

北門學士 唐劉禕之少以文詞稱遷右弘文館直學士上元中與萬元頃等召入禁中參決政事時稱北

門學士

八甄學士 唐李程為學士常規學士入院以階前日影為候程性懶日過八甄乃至時號八甄學士

諫官

忠言逆耳 沛公見秦宮室之富欲留居之樊噲諫曰
凡此奢麗之物皆秦所以亡也公何用焉願還灞上
不聽張良曰忠言逆耳利于行乃還

真諫議 蕭鈞為諫議大夫永徽中爭盜庫財死罪曰
囚罪當死但恐天下謂陛下重貨輕法任喜怒殺人
帝曰真諫議也

六科給事中名始秦漢置給事黃門職始秦置諫大夫
唐分為左右

真諫官 唐李景伯為諫議中宗侍宴命諸臣為回波
詩衆皆以諂言媚上景伯獨為規箴語以諷帝不悻

中書令蕭至忠曰景伯樂不忘規真諫官也

碎首金階 唐敬宗好游畋劉栖楚為拾遺出班苦諫
以額叩龍墀血流被面

鐵補闕 唐乾寧中楊貽德為諫議正真敢言不避權
倖人目為鐵補闕

殿上虎 宋劉安世正色立朝面折廷諍每犯雷霆之
怒則執簡却立俟天威少霽復前極論必得請乃已
人稱之曰殿上虎

鱣章 宋任伯兩性剛鯁持論勁直為諫官僅半載所
上一百疏皆係天下治體號鱣章

魯直 魯宗道為右正言風聞彈疏真宗厭之自訟罷

去他日上追念其言御筆題曰魯直

朝陽鳴鳳 唐高宗時自韓瑗褚遂良死內外以言為

諱高宗造奉天宮李善感始上書極言之時人謂之朝陽鳴鳳

立仗馬 李林甫專權恐諫官言事謂之曰諸君見立仗馬乎終日無食三品料及其一鳴輒斥雖欲勿鳴其可得乎

拾齒 宋張靄太祖方彈雀後苑靄亟請入奏事及見所奏乃常事耳上怒靄曰竊謂急于彈雀上以斧柄撞其齒齒墮徐拾之上曰欲訟朕耶靄曰臣何敢訟陛下但有史官在耳

古忠臣 宋鄒浩嘗右正言極論章惇悞國未報而劉
后立復反復建諍被竄史謂之古忠臣浩與陽翟田
畫善初劉后立謂人曰鄒志完不言可以絕交矣浩
既得罪畫迎諸途正色曰使志完隱默居京師遇寒
疾不汗五日死矣豈獨嶺海之外能死人哉

抵家復逮 楊爵言朝廷政事有失人心而致危亂者
五繫獄數年始得釋會復有諫者上曰吾固知釋爵
妄言者立致至矣復就逮時爵抵家方一日忽錦衣
校至校佯曰吾便道省公耳爵笑曰吾固知之與校
同飯飯已曰行乎校曰盍一入為別爵立屏間曰朝
廷有旨見逮吾行矣再繫獄逾年乃出

為朕家事受楚毒 章綸疏陳修德弭災十四事又請
復汪后于中宮以正壺儀復沂王于東宮以正國本
逮詔獄廷杖不死英宗復尉辟嘆曰綸好臣子為朕
家事受楚毒拜禮部侍郎

碎朕衣矣 陳禾劾童貫弄權反覆不置徽宗欲起禾
引帝衣請畢其奏衣裾落帝曰正言碎朕衣矣禾曰
陛下不惜碎衣臣豈惜碎首以報內侍請易衣帝却
之曰留以旌直臣

憚黯威稜 武帝嘗曰甚矣黯之戇也古有社稷臣黯
近之矣黯前奏事帝不冠不敢見淮南王謀逆憚黯
威稜遂寢

責育不能過 唐魏徵太宗朝諫議大夫狀貌不揚有
胆氣犯顏敢諫雖上怒甚而徵神色自若議者謂責
育不能過

瓦為油衣 谷那律博洽羣書褚遂良稱曰九經庫從
太宗出獵遇雨因問油衣若何而不漏耶那律曰以
瓦為之當不漏上嘉其直

謫死 陳剛中性慷慨敢論事胡銓以劾檜貶剛中啟
曰知無不言願借尚方之劍不遇故去聊乘下澤之
車檜怒遂與張九成同謫客死貧不能葬士論惜之
小官論大事 曹輔為秘書正字徽宗多微行輔上疏
極言諫太宰余深曰輔小官何敢言大事輔對以大

官不言故小官言之官有大小愛君之心則一遂徧
管郴州

忠良鯁直 陳諤負抗直聲舉劾權貴無所避上呼為
大聲秀才常忤旨命坎瘞奉天門外七日不死赦還
搏擊愈甚歷任中外所至能其官終為忌者致貶上
一日問大聲官兒何在直署輔導使人得聞過乃召
還上書忠良鯁直四字賜之示寵異焉

直聲震天下 海瑞為南平教諭謁上官止長揖曰叅
師席不可屈膝也主戶部政疏諫下獄直聲震天下
劾嚴嵩得慘禍 沈鍊疏劾嚴嵩父子為奸竄名白蓮
教中僂于邊楊繼盛論嵩專權悞國五奸十大罪棄

東市

劾逆璫而受酷刑死者萬璟廷杖死高攀龍投水死楊
璉左光斗周順昌繆昌期周宗建黃尊素魏大中
被逮詔獄拷掠死鄒維連謫戍死俱江浙人

御史

白簡 晉傳玄為御史每有奏劾值或日暮捧白簡整簪帶竦誦不休坐以待旦貴遊懾服臺閣風生

烏臺 漢成帝時御史府列柏樹有野烏數千棲其上故稱烏臺亦稱柏臺

法冠 繡衣 漢書法冠御史冠也本楚王冠也秦滅楚以其君冠賜御史也繡衣御史漢武帝所置法冠一名獬豸冠

獨擊鵲 宋王素既升臺憲風力愈勁嘗與同列奏事上有不懌衆皆引去素方論列是非俟得旨乃退帝數曰真御史也人皆目為獨擊鵲

石御史 唐劉思立舉進士高宗擢為御史執法不阿
彈劾權貴人號石御史

驄馬御史 後漢桓興為侍御史直言無所忌諱常乘
白馬京師憚之為語曰行行且止避驄馬御史

鉄面御史 宋趙忞少孤貧舉進士及為殿中侍御彈
劾不避權貴號為鉄面御史

豹直 漢輿服志大駕屬車八十一乘皆尚書臺省官
所載最後一乘侍御史所乘獨懸豹尾故曰豹直

節度胆落 唐敬宗朝夏州節度使李佑入朝違詔進
奉御史温造彈之佑趨出待罪股慄流汗謂曰吾夜
踰蔡州擒吳元濟未嘗心動今日胆落于温御史矣

埋輪當道 後漢張綱為御史安帝時遣八使按行風俗綱獨埋其車輪于洛陽都亭曰豺狼當道安問狐狸遂劾大將軍梁冀兄弟

頭輒乘輿 申屠剛建武初拜侍御史廷臣畏其鯁直時隴蜀未平上欲出遊剛力諫不聽以頭輒乘輿馬不得前

貴戚泥樓 漢李景讓為御史大夫剛直自持不畏權倖內臣貴戚有看街樓閣皆泥之畏其彈劾

劾燈籠錦 宋唐介為御史劾文彥博知益州日以燈籠錦媚貴妃致位宰相請逐彥博仁宗怒謫介英州別駕

炎暑為君寒 唐岑參送侍御韋思謙詩曰聞欲朝金闕應須拂豸冠風霜隨雁去炎暑為君寒

天變得末減 楊瑄天順初為御史劾曹吉祥石亨怙寵擅權後為曹石文致坐死將刑會大風拔木吹正陽門下馬牌于郊外得末減子源為五官監候以占候上言指斥劉瑾瑾怒曰爾何官亦學為忠臣乎杖而戍之劉瑾之亂大臣科道同日勒令致仕四十八人以其名榜示天下源之同鄉御史熊卓與焉

使臣

一介行李 左傳子員曰君有楚命亦不使一介行李
告于寡君

一乘之使 韓信破趙欲移兵擊燕武涉說信曰不如
發一乘之使奉咫尺之書以使燕燕必從風而靡

堂堂漢使 蘇武使匈奴匈奴脇武令拜武不從以刀
臨之武曰堂堂漢使安能屈膝于四夷哉

埋金還鹵 唐杜暹使鹵以金遺暹固辭左右曰公使
絕域不可失戒心乃受焉陰埋幕下已出境乃移文
俾取之突厥大驚

口伐可汗 唐突厥攻太原鄭元璿持節往勞既至以

虜以不信咎中國璫隨語持折讓無所屈徐乃數其背約突厥愧赧引兵還太宗賜書曰知卿口伐可汗邊火息燧朕何惜金石賜卿子卿哉

樓斬樓蘭 龜茲樓蘭二國常殺漢使傅介子謂霍光曰樓蘭龜茲反覆不誅無所懲霍光使介子行介子齎金幣以賜外國為名樓蘭貪漢寶物求見介子與飲陳物示之王飲醉介子使壯士刺殺之諭以王負漢罪遂將王首還詣闕上嘉其功封義陽侯

少年狀元 宋王拱辰至和二年聘契丹見其主于混同江設宴垂釣每得魚必酌酒飲客親鼓琵琶侑觴謂其相曰此南朝少年狀元也

臣不生還 曹利用契丹議和假崇儀副使奉書以行
真宗曰契丹如貪歲幣非國家細事或求不厭當以
理絕之利用答曰虜若妄有所求臣不敢生還

執節不屈 張騫以使通大夏還為校尉封博望侯後
為將軍使大夏窮河源楊子淵騫篇張騫蘇武之奉
使也執節沒身不屈王命雖古之名使其猶劣諸

郡守

京府始君陳尹東郊漢武帝因更名內史為京兆尹置丞置治中宋太祖置通判推官本唐節度使屬有推官判官

五馬 通齊聞覽漢時朝臣出使以駟馬為太守增一馬故稱五馬

刺史 唐志武德中改太守曰刺史天寶中又改刺史曰太守。郡守魏文侯始置郡守秦始皇置郡丞即今同知漢置州牧景帝更太守守宋高宗始稱知府始改唐郡稱府

黃堂 吳郡志吳郡太守所居之堂乃春申君所居之

殿也數火塗以雌黃故曰黃堂

毆蚊扇 唐袁光庭典守名郡有異政明皇謂宰輔曰
光庭性逐惡如扇毆蚊

五袴 漢廉范為蜀郡太守除火禁百姓便之歌曰范
叔度來何暮不禁火民安作昔無襦今無五袴

麥兩岐 漢張堪為漁陽太守擊匈奴開稻田千萬頃
勸農致殷富百姓歌曰桑無附枝麥秀兩岐張君為
政樂不可支

禾同穎 梁柳渾為吳興太守嘉禾同穎一莖兩穗
水晶燈籠 趙宋張中庸為詳州刺史洞察民偽民號
為水晶燈籠

照天蠟燭 田元均治成都有聲民有隱惡輒摘發之
蜀人謂之照天蠟燭

賣刀買犢 漢龔遂為渤海太守民有帶刀劍者遂令
賣劍買牛賣刀買犢

獨立使君 五代裴俠守河北入朝周太祖命獨立曰
裴俠清慎奉公為天下最有如俠者與之俱立眾默
然朝野歎服號獨立使君

天下長者 漢文帝謂田叔曰公知天下長者乎田叔
請其人帝曰雲中太守孟舒是也

名父杜母 漢召信臣為南陽太守興利除害吏民信
愛號為名父杜詩亦有南陽守性節儉而政治清平

南陽為之語曰前有召父後有杜母

願得耿君 漢耿純為東郡太守多善政盜賊清寧內
召去任百姓思慕不已光武駕過東郡百姓數千隨
車駕云願得耿君

借寇 漢寇恂為潁州川太守光武召為執金吾後光
武幸潁川百姓遮道曰願復借寇君一年乃留鎮之
魏郡岑君 後漢岑熙為魏郡太守視事三年人歌之
曰我有枳棘岑君伐之我有蝨賊岑君過之犬不吠
夜足下生鼈

平州田君 唐田仁會為平州太守歲旱自暴以祈雨
時雨大至年遂豐登人歌曰父母育我兮田使君挺

精神兮上天聞

大小馮君 漢馮立徙西河上郡太守與兄馮野王相
伐代民歌之曰大馮君小馮君兄弟繼踵相因循聰
明賢知恩惠民政如魯衛德化均周公康叔猶二君
二邦爭守 宋杜衍知乾州未暮安撫使察其治行以
公權鳳翔二邦之民爭于界上一曰此我公也汝奪
之一曰今我公也汝何有焉

一龜一鶴 宋趙忞任成都攜一龜一鶴以行其再任
也屏去龜鶴止一蒼頭執事張公裕贈以詩云馬諧
舊路行來滑龜放長沙不共來

卧治長沙淮陽 漢武帝拜汲黯為淮陽太守黯伏謝

不受印帝曰君薄淮陽耶吾以淮陽軍民不相得欲借卿之郡卧而治之耳乃進黜以諸侯相秩居淮陽良二千石漢宣帝曰庶民所以安其田里而無歎息愁恨之心者政平訟理也與我共此者其良二千石乎

承流宣化 董仲舒曰今之郡守縣令民之師帥所以承流宣化

褰帷 賈琮為冀州刺史行部升車言曰刺史當遠聽廣視糾察美惡何可反垂帷幄以自蔽乎乃命御者褰帷

露冕 郭賀為荊州刺史治有殊政明帝巡狩賜以三

公之服勅行部去襜露冕以使百姓見之以彰有德
兒童竹馬 郭伋字細侯拜并州牧行部西河有數百
小兒騎竹馬迎于路次問曰兒曹何來對曰聞使君
到喜故來迎耳

河潤九里 郭伋為潁川太守召見帝勞之曰郡得賢
能太守去帝城不遠河潤九里冀京師並受其福也
虎北渡河 後漢劉琨初為江陵令縣有火災琨叩頭
反風火隨滅守弘農虎負子渡河而去帝嘉之徵為
光祿勳召問反風滅火及虎北渡河行何德政而致
此琨對曰偶然耳帝歎曰長者之言

別利器 虞詡為朝歌長時賊數千人攻殺長吏故舊

皆弔詡曰不遇盤根錯節何以別利器乎

二天 後漢蘇章為冀州刺史有故人為清河令以賂敗章乃設酒款之故人喜曰人有一天我獨有二天章曰今日蘇孺文與故人飲酒私情也明日冀州刺史白奏事公法也遂舉正其罪郡界清肅

治行第一 漢黃霸為潁川太守戶口歲增治行為天下第一是時鳳凰神雀數集郡國潁川尤多賜爵關內侯黃金百斤

開鑑湖 漢馬臻為會稽太守開鑑湖得田九千餘頃豪石惡之告臻開河發掘古塚無數徵下獄遣官覆按詭稱並不見人云是鬼訟臻竟被戮其後越民承

河之利立祠祀之

一錢清 後漢劉寵為會稽太守多善政將去父老齋
錢送之曰明府下車以來狗不夜吠民不識吏今當
遷去聊為贐送寵為選一大錢受之今號其地曰錢
清

魚弘四盡 梁魚弘嘗語人曰我為郡守有四盡水中
魚罄盡山中麋鹿盡田中穀米盡村中人庶盡

清恐人知 魏志胡質為常山太守在郡九年吏民便
安將士用命子威厲操清白嘗省其父告歸賜其絹
一匹威跪曰大人清白不審於何得此絹質曰是吾
俸祿之餘威乃受之官至前將軍青州刺史對武帝

曰臣父清恐人知臣清恐人不知

酌泉賦詩 吳隱之有清操由晉陵太守轉廣州刺史
至石門酌貪泉賦詩曰古人云水一畝懷于金試使
夷齊飲終當不易心清操不渝屢被褒飾子延之為
太子守延之弟及子為郡縣者皆以廉慎為門法

常懸蒲鞭 崔祖思仕齊為青冀二州刺史在政清勤
而謙卑下士常懸一蒲鞭而未嘗用去任之日士人
思之為立祠

清風遠著 崔光伯為北海太守明帝詔曰光伯自位
海沂清風遠著可更申三年以廣風化

清廉石見 虞愿會稽人為晉安太守海邊有越王石

常隱雲霧相傳云清廉太守乃得見愿往觀之清徹無所隱蔽

萬石秦氏

後漢秦彭與羣從同時為二千石者五人

三輔號曰萬石秦氏遷山陽太守百姓懷愛莫有欺犯轉潁守有鳳凰麒麟嘉禾甘露之瑞集其郡境

得如馬使君 馬默為登州知府士民愛戴其後蘇軾起知是郡父老迎于路曰公為政愛民得如馬使君乎軾異之

鄧侯挽不留

鄧攸清和平簡貞正寡欲授吳郡太守

載米之郡俸祿無所受惟飲吳水而已後去郡百姓數千人留牽攸船不得進吳人歌曰恍如打五鼓雞

鳴天欲曙鄧侯挽不留謝令推不去

六駁食獸 張華原兖州刺史折獄明恕囹圄一空先是境內有猛獸為民害患華原下車甑山中忽有六駁食獸民害頓除

虎去蝗散 宋均為九江守郡多虎暴民患之均至下令曰勤勞張捕非憂恤之本也其務退奸貪進良善除一切檻穿虎皆渡江而東時楚沛飛蝗蔽天入九江界者輒散去

冰上鏡中 王覲知蘇州民歌之曰吏行冰上人在鏡中

民頌守德 陶安為饒州知府民謠曰千里榛蕪侯來

之初萬姓耕闢侯去之日又曰湖水悠悠侯澤之流
湖水有塞我侯之德

合浦還珠 孟嘗為合浦太守合浦產珠居人採珠易
米時二千石貪污珠徙去及嘗至廉潔化行一年去
珠復還

州縣幕判丞簿尉吏

知州 宋置知州名因唐始舜有州牧宋太祖置州通判知縣周置縣正秦孝公置縣令丞唐宣宗始置知縣宋仁宗置縣丞隋煬帝置主簿

上應列宿 後漢館陶公主為子求郎不許賜錢十萬緡明帝謂羣臣曰郎官上應列宿出宰百里苟非其人則民受其殃矣

鳧鳥 唐顯宗時王喬為葉縣令有神術每朔望朝帝恠其來速不見車騎密令太史伺之言其臨至有雙鳧從南飛來舉羅張之但得雙鳥詔尚方視之則向年所賜尚書履也

良令 韓子晉公問趙武曰中牟三國之股肱邯鄲之
肩髀也寡人欲得一良令其誰可武曰邢伯可

中牟三異 後漢魯恭為中牟令蝗不入境司徒袁安
遣使往察之值恭息桑陰下有雉在旁使者謂小兒
曰何不捕之曰雉將雛乃語恭曰公為政有三異積
德禳災一異仁及禽獸二異童子有仁心三異

琴堂 宓子賤治單父喜彈琴身不下堂而單父治唐
詩云百里春風回草野一輪明月照琴堂

花滿河陽 潘岳為河陽令公餘值桃李花人稱曰花
滿河陽

神君 唐喬智明為隆慮令縣民愛之號神君黃浮為

重陽令亦號神君

聖君 昔曹掾據補臨淄令縱死囚歸家剋日而還一縣歎服號曰聖君

慈父 唐房謙為長葛令治為天下第一百姓號為慈父擢司馬縣民泣曰房明府今去吾屬何以生為乃立碑頌德

陳太丘 漢袁紹問陳元方曰卿家君在太丘遠近稱之何所履行元方曰强者綏之以德弱者撫之以仁杜詩云姚公美政誰與不減當年陳太丘

元魯山 唐元德秀為魯山令誠信化人士夫高其行稱之元魯山

治縣譜 齊傅僧綽子琰並為山陰令父子並著奇績
世謂傅氏有治縣譜子孫相傳不以示人

萊公柏 宋寇準知巴東縣手植雙柏于縣庭民以比
甘棠謂之萊公柏

魯公浦 宋真宗朝魯宗道為海鹽令疏治東南舊港
口導海水至邑下人以為利號魯公浦

晉陽保障 晉趙簡子使尹鐸為晉陽將行請曰為蘭
絲乎為保障乎簡子曰保障哉

花迎墨綬 唐岑參送宇文舍人出宰元城詩縣花迎
墨綬關柳拂銅章別後能為政相思淇水長

第一策 劉玄明歷建康山陰令治每為天下第一傳

翻代之問玄明日願聞舊政對曰作令無他術惟日
食一升米飯而莫飲酒此第一策也

公田種秫 陶潛為彭澤令縣有公田悉令種秫曰令
吾常醉于酒足矣

民之父母 王士弘為海寧知縣有惠政禱甘霖除虎
害邑人歌曰打虎得虎祈雨得雨豈弟君子民之父
母

闢荒 溫縣知縣沃野令民墾闢荒蕪樹藝桑棗百姓
歌曰田野闢沃公力衣食足沃公育

思我劉君 劉陶順陽長多惠政以疾免民思而歌之
曰悵然不樂思我劉君何得復來安我下民

進秩還治 周健知全州任滿民詣闕請留進秩還治
楊士奇贈以詩有云歸到清湘三月暮郊南騎馬勸
春耕

三善名堂 沈度為餘干令父老以三善名其堂一田
無廢士二曰市無游民三曰獄無宿繫

雀鹿之瑞 吳在木知餘干有白青鹿之瑞民歌曰吳
在木政嚴肅惡者憂羈囚善者樂化育烏有白翎雀
獸有青毛鹿不見大聲急走人昔之屢空今皆足
張侯 張謹為德令民頌之曰張侯張侯敷政優游農
樂其業禾麥有秋

侯禦侯食 何正為萍鄉令民歌之曰寇至侯禦之民

飢侯食之

入幕之賓 晉郗超為桓溫參謀謝安王坦之詣新亭
論事溫令超卧帳中聽之風動帳開安笑曰郗生可
謂入幕之賓矣

蓮花幕 南史王儉用庾果之為衛將軍長史蕭洸與
儉書曰盛府元僚實難其選庾景行泛綠水芙蓉何
其麗也時人以入儉府為蓮花幕

解事舍人 唐齊澣開元初姚崇擢為中書舍人論駁
詔誥皆援證古誼朝廷大政必資之時號解事舍人
判決無壅 南史孔凱除長史醉日居多而明曉政事
醒時判決未嘗有壅人曰孔公一月二十九日醉勝

世人二十九日醒也

髯叅短薄 晉桓溫辟王珣為主簿郗超為叅軍超多
鬚髯珣體短小人語曰髯叅軍短主簿能令公喜能
令公怒

滄海遺珠 狄仁傑為汴州叅軍以吏誣訴即訊黜陟
使閻立本異其才謝曰仲尼稱觀過知人君可謂滄
海遺珠矣薦授并州法曹叅軍高宗幸汾陽宮道出
妬女祠俗言盛服過者致風雷之變更發卒數萬改
馳道仁傑曰天子之行風伯清塵雨師灑道何妬女
避耶止其役帝壯之出為寧州刺史

觀親耕勸農 裘賢通判潮州為政勤愛民篤嘗出勸

農釋冠帶執農具以耕其妻饁之其年大熟人皆以
為勸農所致

不寬不猛 楊璣為高郵判民頌曰為政不寬還不猛
處心無黨更無偏

好官人 楊瑾知華亭秩滿父老為二旗以餞題其上
曰農人不為題詩句但稱一味好官人

老吏明 何澣為松江司李知府王衡贈詩云關門共
惜寒毡苦斷獄爭誇老吏明

第一家 陶安字主敬明太祖留參幕府嘗榜其門曰
國朝謀略無雙士翰苑文章第一家

築圍隄 馬王斌龍陽丞為民築堤無旱潦灾民歌之

曰王父母築園堤民樂業我無飢

禱神斃虎 王昇桐城縣丞時黃蘗山虎白晝噬人昇

禱于神虎忽自斃

余不負丞 唐崔斯立為藍田丞始至喟然曰丞哉丞哉余不負丞而丞負余庭有老槐四行南墻鉅竹千挺斯立痛掃溉對樹二松日吟哦其間有問者輒對曰余方有公事子姑去

贊府 裴子羽為下邳令晴張晴為縣丞二人俱有聲氣而善言語論事移時吏人相謂曰縣官甚不和長官道雨贊府稱晴以此終不得合也

廉吏重聽

漢黃霸為令許丞年老病聾吏白欲逐之

霸曰許丞廉吏雖老尚能拜起重聽何妨

清靜無欲 後漢張玄遷陳倉縣丞清靜無欲專心經

史

仇香 後漢仇覽陳留人考城令王渙聞覽以德化人
署為主簿謂渙曰主簿得無少鷹鷂之志耶覽曰以
為鷹鷂不如鸞鳳渙曰枳棘非鸞鳳所棲百里豈大
賢之路

鴻漸之賓 白氏六帖鳳棲之位鴻漸之賓

千里駒 韋元將為郡主簿楊處稱曰韋主簿有長城
風昂昂然千里駒也

關中三傑 朱先庭調萬年主簿邑人謂之明鏡時程

伯淳鄆縣簿張三甫武功簿與光庭均有才名故關
中號為三傑

才拍翰林肩 黃山谷送謝主簿詩云官栖仇香結才
拍翰林肩

米易蝗 孫覺為合肥簿值歲旱課民捕蝗覺言民方
艱食捕得蝗若干官以米易之捕必盡力守悅推其
法行之竟不損禾

少府 李白贈瑕丘王少府杜甫贈華陽李少府唐朝
縣尉多稱少府

黃綬 唐朝縣尉之綬黃色陳子昂送齊少府序黃綬
位輕而青雲望重

梅仙 西溪梅福為南昌縣尉上疏言事不用遂棄官

一朝攜妻子去九江不知所終後為吳門市卒

聰明尉 唐魏奉古為雍丘尉嘗公讌有客草序五百

言奉古曰此舊作也朗背誦之草序者默然奉古徐
笑曰適覽記之非舊習也由是知名人號聰明尉

鉄面少府 宋楊王休調台州黃岩尉邑有豪民武斷

一方具得其奸狀白于郡黥隸他州閭里歡稱為鉄

面少府

五色絲棒 曹操年二十舉孝廉為郎除洛陽比部尉

入尉解繕治四門造五色棒懸門左右犯罪者不避

其豪強皆棒殺之京師斂跡

金灘灘鵞

唐河南伊閭縣前水中每僚佐有入臺省

者先有灘出石礫金砂牛僧儒為尉一日報灘出有
老吏觀之曰此必分司御史若是西臺當有雙灘鵞
至僧儒祝曰既有灘何惜灘鵞語未竟一雙飛下不
旬日召拜西臺御史

鄭尉除奸

鄭虎臣會稽尉也解賈似道安置循州侍

妾尚數十人虎臣悉屏去奪其寶玉撤轎蓋暴烈日
中令昇轎夫唱杭州歌謔之窘辱備至至漳州木綿
菴虎臣諷令自殺似道不從虎臣曰吾為天下殺此
賊雖死何憾遂囚似道于別室即廁上拉似道推
殺之

霹靂手 唐裴琰之為同州司戶年少刺史李崇義輕之州中積案年舊案數百崇義促之判決琰之命吏書數人遞紙筆須臾剖斷崇義畢驚曰公何忍藏鋒以成鄙人之過由是大知名人稱霹靂手

廉自高 劉子敏由御史左遷侯官典史自署曰祿薄儉常足官卑廉自高

刀筆 蕭曹出身刀筆古者用版牘吏書以刀削書之故吏稱刀筆功名

學官

學校 有虞氏始立國學漢文翁守蜀起學宮始天下
皆立學後魏文帝始立郡縣學。唐高祖始詔國學
立周孔廟高宗始勅天下皆立廟特祀孔子初並祀
周公。舜始制釋奠釋采。魏正始七年始祀孔子
于太學前此皆祀于闕里釋奠晉武帝始皇太子釋
奠隋四仲月上丁釋奠。魏曹芳始之以顏子配饗
唐太宗加左丘明等配享宋神宗加孟子配享

儒學 宋神宗各府置教授掌教諸生始戰國博士祭
酒漢武帝置博士于京師文學于郡國及唐太宗詔
天下淳師為學官

取法為則 胡瑗嘗為湖州學官言行而身化之使誠
明者達昏愚者厲而頑傲者革其為法嚴而信為道
久而尊自景祐明道以來學者有師惟瑗與孫復石
介三人慶歷四年建太學于京師有司請下湖州取
瑗教學之法以為則名為諸生官教授

附官制後

誥勅 人臣五品以下其父母與妻封贈之命曰勅命
其寶用勅命之寶受封者曰勅封五品以上其祖父
母父母與妻封贈之命曰誥命其寶用誥命之寶受
封者曰誥封

封贈 人臣父母與妻生前受封者曰勅封誥封人稱
之曰封君死後受封者曰勅贈人稱之曰贈君

母妻封號 凡品級官員封及其母妻者正從一品母
妻封一品夫人正從二品母妻封夫人正從三品母
妻封淑人正從四品母妻封恭人正從五品母妻封
宜人正從六品母妻封安人正從七品母妻封孺人

文官補服 一、二仙鶴與錦雞，三、四孔雀雲雁飛，五品白鷗，惟一樣，六、七鷺鷥灘鴻，宜八、九品官，并襍職，鶻鶻練雀與黃鸝，風憲衙門專執法，特加獬豸、邁倫、夷武官補服。公侯駙馬伯麒麟，白澤裘，一、二繡獅子，三、四虎豹，優五品熊羆，俊六、七定為彪，八、九是海馬，花樣有犀牛。

文勳階 文正一品，初授特進，榮祿大夫，陞授加授俱特進，光祿大夫，左右柱國，月俸八十七石。從一品，初授榮祿大夫，陞授加授俱光祿大夫，柱國，月俸七十二石。正二品，初授資善大夫，陞授資政大夫，加授資德大夫，正治上卿，月俸六十一石。從二品，初

授中奉大夫陞授通奉大夫加授正奉大夫正治卿
月俸四十八石。正三品初授嘉議大夫陞授通議
大夫加授正議大夫資治尹月俸三十五石。從三
品初授亞中大夫陞授正中大夫加授大中大夫資
治少尹月俸二十六石。正四品初授中順大夫陞
授中憲大夫加授中議大夫贊治尹月俸二十四石
。從四品初授朝列大夫陞授加授俱朝議大夫贊
治少尹月俸二十石正。正五品初授奉議大夫
陞授加授俱奉政大夫修正庶尹月俸十六石。從
五品初授奉訓大夫陞授加授俱奉直大夫協正庶
尹月俸十四石。正六品初授承直郎陞授承德郎

月俸十石。從六品初授承務郎陞授儒林郎儒士

出身宣德郎吏員才幹出身月俸八石。正七品初

授承仕郎陞授文林郎儒士出身宣議郎吏員才幹

出身月俸七石五斗。從七品初授從仕郎陞授徵

仕郎月俸七石。正八品初授迪功郎陞授修職郎

月俸六石六斗。從八品初授迪功佐郎陞授修職

佐郎月俸六石。正九品初授將仕郎陞授登仕郎

月俸五石五斗。從九品初授將仕郎佐陞授登仕

佐郎月俸五石。未入流月俸三石

武勳階 正一品初授特進榮祿大夫陞授加授俱特

進光祿大夫右柱國。從一品初授榮祿大夫陞授

加授俱光祿大夫柱國。正二品初授驃騎將軍陞授金吾將軍加授龍虎將軍上護軍。從二品初授鎮國將軍陞授定國將軍加授奉國將軍護軍。正三品初授昭勇將軍陞授昭毅將軍加授昭武將軍上輕車都尉。從三品初授懷遠將軍陞授定遠將軍加授安遠將軍輕車都尉。正四品初授明遠將軍陞授宣威將軍加授廣威將軍上騎都尉。從四品初授宣武將軍陞授顯武將軍加授信武將軍中騎都尉。正五品初授武德將軍陞授武節將軍加授驍騎尉。從五品初授武備將軍陞授武毅將軍加授飛騎尉。正六品初授昭信校尉陞授承信校尉加

雲騎尉。從六品初授忠顯校尉陞授忠武校尉加武騎尉。正七品初授忠翊校尉陞授忠勇校尉。

從七品初授毅武校尉陞授修武校尉。正八品初授進義校尉陞授保義校尉凡月俸俱與文官同

品級正從一品 正一品太師太傅太保宗人令左右宗正左右宗人左右都督。從一品少師少傅少保太子太師太子太傅太子太保都督同知

正從二品 正二品太子少師太子少傅太子少保尚書都御史都督僉事正留守都指揮使襲封衍聖公。從二品布政使都指揮同知

正從三品 正三品太子賓客侍郎副都御史通政使

大理寺卿太常寺卿詹事府尹按察使副留寺都指
揮僉事指揮使。從三品先祿寺卿太僕寺卿行太
太僕寺卿苑馬寺卿叅政都轉運鹽使留守司指揮
同知宣慰使

正從四品 正四品僉都御史通政大理寺少卿太常
寺少卿太僕寺少卿少詹事鴻臚寺卿京府丞按察司
副使行太僕寺少卿苑馬寺少卿知府衛指揮僉事
宣慰司同知。從四品國子監祭酒布政司叅議鹽
運司同知宣慰司副使宣撫司宣撫

正從五品 正五品華蓋謹身武英殿大學士文淵東
閣春坊大學士翰林院學士庶子通司叅議大理寺

丞尚寶司卿先祿寺少卿六部郎中欽天監正太醫院使京府治中宗人府經歷上林苑監正按察司僉事府同知王府長史儀衛正千戶宣撫司同知。從五品侍讀侍講學士諭德洗馬尚寶鴻臚少卿部員外郎五府經歷知州鹽運司副使鹽課提舉衛鎮撫副千戶儀衛副招討宣撫司副使安撫使安撫

正六品大理寺正詹事丞中允侍讀侍講司業太常寺丞尚寶司丞太僕寺行太僕寺丞主事太醫院判都察院經歷京縣知縣府通判上林苑監副欽天監副五官正兵馬指揮留守司都司經歷斷事百戶典仗審理正神樂觀提點長官副招討宣撫僉事安撫同

同知善世正。○從六品贊善司直郎修撰光祿寺丞
署正鴻臚寺丞大理寺副京府推官布政司經歷理
問鹽運司判官州同知鹽課司提舉市舶河梁副提
舉安撫司副使

正七品都給事中監察御史編修大理寺評事行人司
正五府都察院都事通政司經歷太常寺博士典簿
兵馬副指揮營膳司所正京縣丞府推官知縣按察
司經歷留守司都司都事副斷事審理安撫司僉事
蠻夷長官。○從七品翰林院檢討左右給事中中書
舍人行人司副光祿寺典簿署丞詹事府大僕寺主
簿京府經歷靈臺郎祠祭署奉祀州判官鹽課司副

提舉布政司都事副理問鹽運司衛宣慰招討司經
厯蠻夷副長官

正八品國子監丞五經博士行人部照磨通政司知事
京主簿保章正御醫協律郎典牧所提領營繕所副
大通關寶鈔龍江司提舉衛知事府經歷縣丞煎鹽
司提舉按察司知事宣慰都事王府典寶典簿奉祀
良醫典膳正紀善講經至靈元符崇真宮靈官。從
八品清紀郎翰林院典籍國子監助教典簿博士光
祿錄事監事鴻臚寺主簿京府運司知事黎孳壺正
祠祭署祀丞布政司照磨王府典膳奉祀典寶良醫
副宣慰司經歷神樂觀知觀崇真宮副靈官左右覺

義玄義

正九品校書侍書國子監學正部檢校鴻臚寺署丞五
官監候司歷營繕所丞典牧所會同館文思院丞運
寶鈔廣運廣積贓罰十字庫顏料皮作鞍轡寶源局
織染所京府職染局大使龍寶江鈔副提舉府知事
縣主簿長史司主簿典儀正典樂牧監正茶馬大使
贊禮郎奉鑾宣撫安撫知事。從九品待詔司諫通
事舍人正字詹事府錄事司務學錄典籍籍鳴贊序班
司農農漏刻博士司牧大使牧監副圉長太醫院提
舉司鹽課司州所吏目軍儲御馬都督府門倉軍器
局大使承運寶鈔廣運廣積贓罰十字庫副使典牧

所會同館文思院副使廣盈太倉銀庫太僕寺京府
庫都稅宣課柴炭司大使顏料皮作鞍輿轡寶源局
織染局京府織染局副使草場大使孔顏孟子孫教
授按察司檢校府宣撫司照磨典儀副教授伴讀都
司運司府京衛宣撫宣慰司學教授司庫司府倉襍
造織染局稅庫司大使司獄巡檢茶馬副使正術正
科都綱都紀常太常司樂教坊韶舞司樂

未入流 孔目國子監掌饌學正教諭訓導兵馬斷事
長官司吏目司牲司牧副使府檢校縣典史軍器局
柴炭司副使遞運所大使驛丞河南泊所閘壩官關
大使牧監錄事郡長提控案牘都督府御馬軍儲門

倉副使廣盈庫都課都稅稅課司副使茶鹽課司使
府州縣衛所倉場大使副鹽運司府衛提舉司所州
縣庫大使副使司府州軍器織染襍造局副使宣德
倉司竹鐵冶河州遼陽青州府樂安稅課司大使茶
運批驗所巾帽針工局慶遠裕民司大副使司庫副
使鹽倉稅課鈔紙印鈔鑄印抽分竹木惠民金銀場
惠民局水銀硃砂場局生藥庫長史司倉庫大副使
縣襍造局副使典術典科訓術訓科副都綱都紀僧
正道正僧會道會

仕途 隋煬帝始置進士科取士唐始縉紳必由科目
始重資格。漢二千石滿三載任同產子一人為郎

○秦始試吏入仕漢丙吉龔勝是也始納粟拜爵始
皇因旱蝗漢武景沿之至靈帝時富者先入錢貧者
赴官倍輸○堯始考功魏崔亮始限年○漢制久任
如古晉宋始制_年六期為滿○漢左雄始孝廉數年
滿四十察舉宋敎官闕有官年實年○後周始制舉
主連坐○漢順帝制選用不得互官謂姻家鄉里人
不交互為官今隔選唐太宗制大功不得連職今迴
避○唐高宗始給告身即給札唐武后始設門籍籍
朝參奏事待詔官出入每月一易之○伊尹始致仕
漢制二千石吏予告賜告唐制致仕五品以上表六
品以下轉奏○唐太宗許子弟十九以下父兄隨任

宋太祖詔羣臣父母迎養